

Kerajaan serius urus ekonomi MADANI ringan beban rakyat

Belanjawan 2025 tumpu tangani isu kos sara hidup

Oleh Mohd Amin Jalil dan Mohd Khidir Zakaria
bhnews@bh.com.my

Port Dickson: Datuk Seri Anwar Ibrahim menegaskan, kerajaan akan menguruskan ekonomi MADANI secara serius, termasuk memastikan kadar inflasi negara kekal rendah sekali gus membantu meringankan beban rakyat.

Perdana Menteri yang juga Menteri Kewangan, turut menegaskan pentadbirannya akan berusaha memastikan tidak berlaku pembaziran dalam kerajaan.

“Syukur Alhamdulillah, sejak kita uruskan ekonomi MADANI ini, kita lihat pertumbuhan ekonomi naik tinggi 5.9 peratus, inflasi terkawal.

“Saya baru balik dari luar negara bertemu Presiden Russia (Vladimir Putin), ada soal jawab dan orang tanya inflasi (kita) dua peratus, ada beberapa bidang makanan tiga peratus.... itu pun jenuh kita hendak kawal.

“Namun kita akan memberi tumpuan kepada strategi untuk menangani kos sara hidup rakyat dalam pembentangan Belanjawan 2025 Oktober depan, walaupun inflasi rendah,” katanya ketika berucap pada Majlis Pelancaran Sambutan Bulan Malaysia Sihat Sejahtera Peringkat Kebangsaan 2024 dan Pelancaran

Dasar Literasi Kesihatan Kebangsaan serta Kempen Perangi Gula di Pantai Batu 1, di sini, semalam.

Yang turut hadir, Menteri Besar Negeri Sembilan, Datuk Seri Aminuddin Harun; Menteri Kesihatan, Datuk Seri Dr Dzulkefly Ahmad dan Setiausaha Kerajaan Negeri, Datuk Mohd Zafir Ibrahim.

Mengulas lanjut, Anwar membandingkan kadar di Malaysia dengan beberapa negara lain yang jauh lebih tinggi.

“Di negara lain terutama di rantau ini seperti Thailand, Singapura dan Indonesia, inflasi mereka lebih tinggi. Russia lapan peratus, Turkiye pula inflasi mereka 40 peratus.

“Itu sebabnya kita kena urus ekonomi ini secara serius dan di antara yang kita bincangkan termasuk dalam soal kesihatan ini ialah jangankan membazir.

“Untuk itu, saya akan jadikan strategi untuk menangani kos sara hidup rakyat dalam pembentangan Belanjawan 2025 Oktober depan,” katanya.

Terdahulu, ketika merasmikan kawasan rehat dan rawat (R&R) lestari pertama lebuh raya Malaysia iaitu R&R Seremban (Arah Selatan) Lebuhraya Utara-Selatan dekat Seremban, Perdana Menteri berkata, kadar tol mungkin boleh diturunkan jika kos pembangunan lebuh raya dapat dikawal, selain tidak berlakunya ketirisan dan rasuah.

Anwar berkata, kos pembangunan lebuh raya sebenarnya boleh dikurangkan, namun meningkat disebabkan terlalu banyak bayaran yang dikeluarkan untuk proses kelulusan.

“Ini mesti dihentikan. Saya percaya Kementerian Kerja Raya, Lembaga Lebuhraya Malaysia (LLM) untuk projek yang seterusnya, pastikan kelulusan disegerakan. Ini boleh berlaku kalau semua bertanggungjawab dan berasakan ini (projek lebuh raya) projek rakyat,” katanya.

Bukan berdendam

Sementara itu, Anwar menafikan dakwaan pihak tertentu kononnya perasaan dendam beliau menjadi punca di sebalik tindakan diambil pihak berkuasa terhadap kes tertentu.

Sebaliknya, Perdana Menteri menegaskan kerajaan tidak sekali mencampuri urusan siasatan dilakukan pihak berkuasa, apatah lagi mempengaruhi tindakan yang diambil.

Beliau berkata, sesiapa sekalipun yang berdepan kes jenayah, maka terpulanglah kepada pihak berkuasa khususnya Polis Diraja Malaysia (PDRM) untuk menyiasat atau mengambil tindakan.

“Setiap minggu ada sahaja kisah skandal baharu. Ada orang kata kerana Anwar berdendam, (itu) tak betul. Kita kena hentikan amalan pimpinan yang guna kuasa demi cari kekayaan peribadi.

“Saya harap betul-betul (perkara ini) difahami. Orang sana (pembangkang) dia tak kira. Saya tak kira siapa dalam soal penyiasatan, ketua-ketua polis ada di sini, siapa salah, ada kes curi motor ke, merompak ke itu kerja polis.

Perdana Menteri menegaskan amalan tidak betul dilakukan mana-mana pihak perlu diperbetulkan untuk mengelak rakyat yang akhirnya menerima nasib.